

Headlines

1. लेफ्टिनेंट गवर्नर मनोज सिन्हा होरें आखेआ ऐ जे जम्मू-कश्मीर च आतंकवाद दा मुकाबला करने ते रमानदारी ब्हाल करने लेई फौज मते महत्वै आहली भूमिका निभा करदी ऐ।
2. प्रधानमंत्री नरेन्द्र मोदी होरें आखेआ ऐ जे सरकार समाज दे हर इक वर्ग दे बच्चे गी स्कूली शिक्षा उपलब्ध करोआने लेई वचनें बज्जी दी ऐ।
3. जम्मू-कश्मीर सरकारै रजौरी, पुंछ, डोडा ते किश्तवाड़ जिलें लेई हैलीकाप्टर सेवा फही शुरु करी दित्ती ऐ।
4. अस्ट्रेलिया दे एडीलेड च खेड्ढी जा करदी बार्डर-गावस्कर ट्रॉफी दे दुए टेस्ट मैच दे अज्ज दुए ध्याड़े भारत नै अपनी दुई पारी च 5एं विकेटें दे नुक्सान पर 128 रन्ज बनाए न।

<><><><><><>

LG Flag Day

लेफ्टिनेंट गवर्नर मनोज सिन्हा होरें अज्ज आखेआ ऐ जे आतंकवाद दा मुकाबला करने ते केन्द्र शासित प्रदेश दे बन्ने आहले ते दूर-दरेडे इलाकें च रवै करदे लोकें गी इक साजगार म्हौल उपलब्ध करोआने लेई फौज बडी महत्वै आहली भूमिका निभा करदी ऐ। एलजी होरें अगो आखेआ जे स्हाड़े थेहारबंद बलें दे बड़े मते जोगदान दी बदौलत जम्मू-कश्मीर अज्ज तेज रफ्तार कन्नै समाजी-आर्थिक विकास दी बत्ता पर अगड़ा बधा करदा ऐ ते विकास-बाददे दे लाह अज्ज प्रदेश दे हर इक कोने तगर इक बरोबर पुज्जा करदे न। सिन्हा होर अज्ज राजभवन जम्मू च सशस्त्र बल झंडा दिवस दे मौके पर आयोजित कार्यक्रम दरान बोला करदे हे। इस मौके उनें जम्मू-कश्मीर दे लोकें अगो अपील कीती जे ओह सशस्त्र बल झंडा दिवस आहले कोष लेई दिल खोलियै दान देन।

<><><><><><>

PM-Flag Day

प्रधानमंत्री नरेन्द्र मोदी होरें अज्ज आखेआ ऐ जे सशस्त्र बलें दा झंडा दिल राष्ट्र दे वीर जवानें दे शौर्य, दृढ़ संकल्प ते बलिदान गी सलामी देने दा ऐ। सशस्त्र बलें दे झंडे दिवस दे मौके उपपर अपने इक सनेह च मोदी होरें आखेआ ऐ जे इंदी बहादरी सारें गी प्रेरणा दिंदी ऐ ते इंडा बलिदान सारें गी विनम्र बनांदा ऐ। उनें लोकें गी सशस्त्र बलें दे झंडे दिन दे कोष च बी योगदान देने लेई आखेआ।

<><><><><><>

Rajnath Flag Day

रक्षामंत्री राजनाथ सिंह होरें अज्ज सशस्त्र बलें दे झंडे दिन दे मौके पर भारतीय सशस्त्र बलें दी हिम्मत, शौर्य ते बलिदान गी नमन कीता। राजनाथ सिंह होरें आखेआ जे सशस्त्र बलें दा झंडा दिन भारतीय सशस्त्र बलें दी हिम्मत ते योगदान गी याद करने दा दिन ऐ। उनें भारत गी सुरक्षत बनाने च अहम भूमिका नभाने लेई उंदी सराहना कीती। सन् 1949 थमां 7 दिसम्बर गी सशस्त्र बल दे झंडे दिन दे तौरा उपपर मनाया जंदा ऐ।

Samba Play Flag Day

जिला सांबा दे गौरमैंट कुड़िएं दे हायर सकैंडरी स्कूल जक्ख च आर्मड फोर्स फ्लैग डे मनाया गेआ। जेह्दे च एनसीसी कैडेटें स्कूल दे स्टाफ, बच्चे ते मकामी लोकें भारत दे वीर जवानें दे परोआरें लेई डोनेट कीता।

<><><><><><>

PM-KV

प्रधानमंत्री नरेन्द्र मोदी होरें अज्ज पूरे मुल्खे च 85 नमें केन्द्रीय विद्यालयें दे खोलने दे मंत्रिमंडल दे फैसले दी सराहना कीती। अपने इक सोशल मीडिया पोस्ट च प्रधानमंत्री मोदी होरें आखेआ जे स्कूली शिक्षा दी पुज्ज गी होर सौक्खा बनाने लेई सरकार आस्सेआ लैता गेदा एह इक होर बड्डा फैसला ऐ। उनें इस गल्ला उप्पर जोर भरेआ जे इस फैसले कन्नै जित्थें मती गिनतरी च विद्यार्थिएं गी फायदा होग, उतीं गै इस कन्नै मते सारे नमें रोजगार दे मौके बी पैदा होंगन।

<><><><><><>

Reasi KV School

केन्द्र सरकार नै जम्मू क्षेत्र च 10 केन्द्रीय विद्यालय खोलने दी घोषणा कीती ऐ। जिंदे च दो केन्द्रीय विद्यालय रियासी जिले च खुल्लने न, मकामी लोकें इस फैसले दा सुआगत कीता ऐ। जेह्ड़ा इस क्षेत्र च शिक्षिक बुनियादी ढांचे च सुधार ते मकामी आबादी गी गुणवत्ता आली शिक्षा उपलब्ध करोआने आस्तै इक महत्वपूर्ण गैह ऐ। नमें केन्द्र विद्यालयें थमां बक्ख-बक्ख सामाजिक ते आर्थिक पृष्ठभूमि आले विद्यार्थिएं गी राश्ट्री मानकें कन्नै सरबंधत आधुनिक शिक्षा दी उपलब्धता गी जकीनी बनाने दी मेद ऐ।

<><><><><><>

CS Jagti

मुख्य सचिव अटल डुल्लु होरें अज्ज कश्मीरी पंडितें दे जगटी आहले विस्थापित कैप दा दारा लाइयै उत्थे उपलब्ध सुविधाएं दा जायजा लैता ते मुकामी लोकें दिएं समस्याएं गी बी सुनेआ। अपने दौरे दरान मुख्य सचिव होर उत्थे बनाए गेदे उपजिला अस्पताल ते हायर सकैंडरी स्कूल बी गे ते उत्थे बी लोकें गी दित्ती जा करदी सुविधाएं दी समीक्षा कीती। इस मौके उनें गी एह जानकारी दित्ती गेई उत्थे रवै करदे 5 ज्हार 131 परोआरें लेई 4 ज्हार 224 फ्लैट, 53 पार्क ते 10 सामुदायिक हालें दी बवस्था उपलब्ध ऐ। एह्दे अलावा सरकार आसेआ उत्थे तकरीबन 6 करोड़ 34 लक्ख रुपें दी लागत कन्नै इक 2 मंजिला सामुदायिक हॉल बी बनाया जा करदा ऐ। गृह विभाग दे प्रधान सचिव, जम्मू दे डिप्टी कमिशनर, जम्मू नगर निगम दे कमिशनर, जम्मू दे एसएसपी, राहत सरबन्धी कमिशनर, स्कूली शिक्षा विभाग जम्मू ते होर बी केई आला अधिकार बी इस मौके पर मजूद हे।

<><><><><><>

Jammu Heli Service

जम्मू-कश्मीर सरकार, खित्ते दे लोकें ते सैलानिएं लेई बवस्थित ते निर्विघ्न जात्तरा ते संपर्क सुविधाएं च बाददा जकीनी बनाने लेई हैलीकाप्टर सेवाएं गी परतियै चालू करी दित्ता ऐ। सोशल मीडिया दी इक पोस्ट राहें सैलसफा निदेशालय नै एह जानकारी दित्ती ऐ जे हैलीकाप्टर सेवा गी जम्मू थमां रजौरी, पुंछ, डोडा, किश्तवाड़ लेई फही शुरु कीता जा करदा ऐ। इस्सै चाल्ली किश्तवाड़ थमां नावापाची, सौंदर ते इन्शान लेई बी एह सेवा फही रम्मी जा करदी ऐ। हैलीकाप्टर टिकटें दी बुकिंग लेई लोक सैलसफा निदेशालय जम्मू दे दफ्तर कन्नै राबता करी सकदे न।

<><><><><><>

PM-TB

प्रधानमंत्री नरेन्द्र मोदी होरें आखेआ ऐ जे देसे दे टीबी दे खलाफ लड़ाई होर बी मजबूत होई गई ऐ, जेहदे च जिनें जिलें च टीबी दे मते मामले न। उनें जिले च मता ध्यान दिंदे होई 100 दिनें दी खास मुहिम शुरु कीती गई ऐ। अपने इक सोशल मीडिया पोस्ट च मोदी होरें आखेआ जे भारत मरीजें गी मती मदाद, जन भागेदारी, नमीं दुआइए, तकनीकें दा इस्तेमाल ते बेहतर निदान उपकरणें कन्नै टीबी कन्नै लड़ाई करदा ऐ। उनें सारे गी अपील कीती जे ओह किट्टे होइयै टीबी गी खत्म करने च मदद करन।

<><><><><><>

TB Kathua

जिला कठुआ थमां ट्यूबरकलोसिस खत्म करने लेई अज्ज कठुआ जिले दे सेहत ते चिकित्सा मैहकमे आस्सेआ कठुआ दे विधायक डॉ. भारत भूषण ते एडीडीसी कठुआ सुरिंदर मोहन होरें प्रचार वैन गी झंडी दस्सियै 100 दिन दिनें दी टीबी गी खत्म करने दी मुहिम गी शुरु कीता। इस मौके उपपर बोलदे होई विधायक भूषण होरें आखेआ जे सरकार नै टीबी दे मामले गी समाज थमां खत्म करने लेई हिले कीते न ते प्रधानमंत्री नरेन्द्र मोदी होरें गी टीबी मुक्त भारत ते स्वरुथ्य भारत दा नारा दित्ता ऐ।

<><><><><><>

Smart India Hackathon

औंदी 11 दिसम्बर थमां आयोजित कीते जा करदे स्मार्ट इंडिया हैकाथॉन 2024 दे साफ्टवेयर संस्करण दी मेजबानी लेई आईआईटी जम्मू पूरी चाल्ली तैयार ऐ। मुख्य भरै थमां 30 टीमां, इस दरान साईबर सुरक्षा सरबन्धी बड़ी मती महत्वपूर्ण चुनौतिएं दा नबेड़ा करने लेई आपू-चै मुकाबला करडन। आकाशवाणी दे जम्मू जिला संवाददाता अंकुश शर्मा दी रिपोर्ट मूजब, आईआईटी जम्मू थमां त्रै टीमां कर्नाटक, दिल्ली ते गुवाहाटी जाइयै अपने-अपने सरबन्धत नोडल केन्द्रें च आईआईटी जम्मू दी नुमाइंदगी करडन। इस राष्ट्रव्यापी पैहलकदमी दा एह 7मां संस्करण ऐ जेहदा आयोजन शिक्षा मंत्रालय आसेआ कीता जा करदा ऐ। केन्द्री शिक्षा मंत्री धर्मेन्द्र प्रधान होर वर्चअल ढंगै कन्नै एहदा उद्घाटन करडन। मुख्य भरै च इस कार्यक्रम लेई 51 नोडल केन्द्र बनाए गेदे न। स्टाडे जिला संवाददाता अंकुश शर्मा नै इस सरबन्धै च आईआईटी जम्मू दे नोडल अधिकारी डाक्टर विजय पाल हुंदे कन्नै गल्लबात कीती। आईआईटी जम्मू दे इक विद्यार्थी नै बी इस मौके पर स्टाडे जिला संवाददाता कन्नै अपने विचार सांझे कीते।

Mishap

रियासी जिले च अज्ज होए दे इक सिड़क हादसे च इक जने दी मौत ते इक होर व्यक्ति जख्मीं होई गेआ ऐ। हासल होई दिएं रिपोर्टें मूजब, मंदे भागें आहली इक ईको गड्डी थराल थमां शिकारी इलाके बक्खी जा करदी ही जिसलै ओह्द सिड़कै शा रूलकियै कोई 200 फुट हेठ जाई डिग्गी। हादसे च इक जने दी मौत होई गेई ते इक होर व्यक्ति गंभीर तौर पर जख्मीं होई गेआ जिसी इलाज लेई अस्पताल च दाखल करोआई दित्ता गेदा ऐ।

<><><><><><>

Cricket

एडीलेड च खेड्ढी जा करदी बार्डर—गावस्कर ट्रॉफी दे दुए टेस्ट मैच दे अज्ज दुए ध्याड़े भारत खलाफ अस्ट्रेलिया नै अपनी पकड़ मजबूती करी लैती ऐ। अज्ज दिनै दा खेड्ढ मुक्कने तगर भारत नै 5 विकेटें दे नुक्सान पर 128 रन्ज बनाई लैते ते ओह् अजें बी अस्ट्रेलिया थमां 29 रन्ज पिच्छे न। भारत दी तरफा ऋषभ पंत ते नितिश रेड्डी होर दिनै दा खेड्ढ मुक्कने तगर क्रीज पर डटे दे हे। एह्दे शा पैहले अस्ट्रेलिया नै अपनी पैहली पारी च 337 रन्ज बनाए ते भारत खलाफ 157 रन्जें दी महत्वपूर्ण बढ़त हासल करी लैती।

<><><><><><>